

## Ha Ummula'n Suyat Paul Kan Timothy

<sup>1</sup> Sakon si Paul un apostoles Jesu Kristu. Chilutukalak kan Apudyus un Malagu kan chitaku ya si Jesu Kristu un puun chi lamlama taku.

<sup>2</sup> Liya suyatku kan sika Timothy un imbi-langku'n tuttuwa'n alakku gapu si pammattim.

Iluwaluk kan Apudyus un Ama taku ya si Jesu Kristu un Apu taku ta kacheguwan chika, tuyungan chika ya mallin-awaoncha som-somoklu.

*Awed Cha Mantudtuchu Si Tuntulli  
(2Pe. 2; Jud. 8-13)*

<sup>3</sup> Timothy, achim liwatan chi imbyegak kan sika si ummoyak ud Macedonia. Chawatok un iinggewka utlat Ephesus ta byegaam cha uchum un tagu utlat ta iyageycha'n mantudtuchu si tilutuli'n tudtuchu. <sup>4</sup> Byegaam bo chicha ta achicha aattingigon cha tilutuli'n ul-ullit un lakwa si awi ya kapuun cha chachakkeycha'n lampeypuwancha. Lappun simbin cha hachi ti mangwacha si oomyan. Lappun mituyungla si kawachin Apudyus un makwa mipagapu si pammati. <sup>5</sup> Ha panggopku'n mangibyega kan cha alla kan sika, taplu cha mamati utlat man-asiay-ayatcha, un ha man-aayatcha mampeypu si mampeykas ya bibiyu'n somsomok ya gettok un pammati kan Apudyus. <sup>6</sup> Cha hachi'n

mantudtuchu si tuntulli, lan-awichencha pammaticha ya makaisi-isikcha un lappun puut chi pin-acha uguchon. <sup>7</sup> Pioncha'n mantudtuchu si lintog un illidchon Apudyus kan Moses, ngim achipuncha maawatan cha pin-acha uguchon ya mas-omcha un chicha kama'd katuttuwa.

### *Ha Useyn Chi Lintog*

<sup>8</sup> Ammu taku un bibiyu lintog lu ustу mangiyuseyan chi tagu. <sup>9</sup> Ammu taku bo un ha lakwaan chi lintog, chakampun un para kan cha tagu'n bibiyu, ngim lakwa lintog para kan cha tagu'n achipun tumungpey si lintog, cha sumusupling, cha lappun pammaticha kan Apudyus ya cha malagbyasuy, cha mangamamsiw kan Apudyus ya cha mangipotpotog si lawwing ya cha kapapatoy un pilatoycha cha amacha ya ilacha ya uchum un tagu. <sup>10</sup> Ya lakwa bo lintog para kan cha kachechegchegas, cha mantitillalung mangasawa si asilleyakicha ya asimbyebyaicha, cha malluku si asintatagucha, cha latuli, cha mangisapata si tilutuli, ya cha losan un tagu'n sumusupling si ustу'n tudtuchu. <sup>11</sup> Ha ustу'n tudtuchu ked mitimbuyuy si Bibiyu'n Chameg mipanggop kan Apudyus un kangatuwan ya machaychayaw, ked siya impiyeyla kan sakon.

### *Ha Lanyamalan Paul Kan Apudyus (Act. 8:3; 9:3-19)*

<sup>12</sup> Manyamalak kan Jesu Kristu un Apu taku un langatod si koscheyk un mangwa kan cha impiyeyla kan sakon, ti imbilangla sakon un

osa'n mantegochen ya chilutukalak un mansimbi kan siya. <sup>13</sup> Ked ulay lu lawwing cha pin-ak ilugud mipanggop kan siya si sin-eygew kan pilaligatak ya pilabiilak cha mamati kan Kristu. Ngim kilacheguwalak kan Apudyus ti achipulak lamati kan Kristu ya lappun ammuk kan cha pin-ak killingwa. <sup>14</sup> Ngim amod chi manchechegun Apu taku kan sakon ti illidchela sakon si pammatik ya ayat un mangay-ayat si asintataguk ti litimpuyugak kan Jesu Kristu.

<sup>15</sup> Awed chi osa'n libyega un tuttuwaon otyan cha losan un tagu, un kalala, "Ummali si Kristu Jesus utla pita ta taguwola cha malagbyasuy." Ked sakon chi osa'n patunged malagbyasuy. <sup>16</sup> Ngim kilacheguwalak kan Apudyus ti sakon chi osa'n mangipain-an Kristu Jesus si kilaalusla ulay kan cha patunged malagbyasuy, ta siya mansampayan cha losan un mamati kan siya ta maidchencha si mallalayun un biyeg. <sup>17</sup> Siyad ipotpotog taku ya chaychayawon taku si Apudyus si ing-inggala ti lappun alungusla. Siya Ari si ing-inggala, Ari un matattagu si ing-inggala un achipun matoy, achipun maila, ya siya abus un Apudyus. Amen!

### *Ha Impiyeyn Paul Un Kawachi Kan Timothy*

<sup>18</sup> Allaya bilin un ipiyeyk kan sika Timothy un alakku, gapu ta imbyegan cha langagammu kan Apudyus mipanggop kan sika un mantegochen un mantudtuchu si ugudla. Ha imbyegacha, hachi otyan chi malegeg si somsomoklu ti sala makagubyatam si lawwing. <sup>19</sup> Igettoklu pamma-tim ya koom losan cha ammun chi somsomoklu

un pion Apudyus. Ti awed cha uchum un langiyagey si ammucha'n ustу ked siya layamalan chi pammaticha.\* <sup>20</sup> Isun chi lakwa kan cha Himeneus ya Alexander, ked impuyangku chicha kan Satalas ta mansomsomkancha ta achicha man-ang-angawan si Apudyus.

## 2

### *Tudtuchu Mipanggop Si Malluwaluwan (1Pe. 3:1-7)*

<sup>1</sup> Ha umula'n ibyegak, masapuy'n iluwaluwan taku cha losan un tagu. Chawaton taku ta kacheguwan Apudyus chicha ya manyaman taku kan Apudyus kan cha tuyungla kan chicha. <sup>2</sup> Iluwaluwan taku bo cha papangat taku un mangituray kan chitaku ya losan un langatu saedcha taplu mallin-awa mambibiyeg taku ya lawaya taku un manchayaw ya mangipotog kan Apudyus ya mangwaan taku si bibiyu'n ugali. <sup>3</sup> Hachi ustу'n luwalu ya siya mampagalas kan Apudyus un Malagu kan chitaku. <sup>4</sup> Ti piola'n matatagu cha losan un tagu ya maammuwancha katuttuwaan mipanggop kan siya. <sup>5</sup> Ti ossaan si Apudyus ya ossaan bo mampatimpuyug kan cha tagu kan Apudyus, siya si Jesu Kristu un lambyalin tagu. <sup>6</sup> Inchuyala biyegla ta malakala kan cha losan un tagu taplu achipun taku machusa. Hachi'n killingwala, siya mangipain-an Apudyus un piola'n matatagu cha losan un tagu. Lakwa si ustу-ustу'n timpu un ingkodchong Apudyus.

---

\* **1:19** 1:19 Ha uchum un piola'n uguchon si Greek ked ilatunguycha somsomokcha, lan-awichencha tuttuwa'n tudtuchu un pilati taku.

**7** Ked gapu si hachi, lachutukalak un mangibegbyega ya apostoles ta inyak ibyegbyega katuttuwaan mipanggop kan siya kan cha Gentil ta mematicha. Tuttuwa cha alla'n ibyegbyegak, chakampun un mantuntulliyak.

**8** Ked si losan un man-um-ummungan cha matati, piok un cha leyaki malluwalu kan Apudyus un mampeykas chi somsomokcha ya achipuncha sumanga-sanga willu makasubo-subog.\*

**9** Ked cha byebyai, masapuy'n ammancha ileyam cha mansisilupcha ya ammucha un mabiin ya chakampun otyan un siyad potpotgoncha kilabiyun chi buukcha ya ulay cha ekuscha'n byalituk, bongey ya mangkangila'n silup. **10** Ti ha mangitullongan si kilabiyun chi byebyai ked ha bibiyu'n pin-ala koon, ti siya miyapot si byebyai'n mangibegbyega un chaychayawola si Apudyus.

**11-12** Achipunku ipalubus cha byebyai un mantudtchu kan cha leyaki willu iturayancha cha leyaki. Masapuy'n gumigillok cha byebyai ya ammancha manchochongngey si mantudtchu kan chicha ya masapuy'n mampakumbyabyacha. **13** Ti ha ummun-ula un killingwan Apudyus ked si Adam un leyaki asila ot si Eve un byebyai.† **14** Ya chakampun un si Adam chi laallilaw ngim ha byebyai, ya siya ummun-ula lakabyasuy kan Apudyus.‡ **15** Ked hachi gapula

\* **2:8** 2:8 Ha uchum un piolan uguchon si Greek ked lappun bo makasangaancha willu manchuwachuwaancha. † **2:13** 2:13 Genesis 2:7, 21-22 ‡ **2:14** 2:14 Genesis 3:1-6

un mapaligatan chi byebyai lu umalak. § Ngim matagu lu ipapatila pammatila\* kan Apudyus ya awed ayatla kan cha asintatagula ya laapudyusan chi somsomokla ya koola ustу.

### 3

*Ha Kilatatagun Chi Mangipangpangu Kan Cha Mamati  
(Tit. 1:6-9)*

<sup>1</sup> Tuttuwa cha alla'n ug-uggud: Lu pion chi tagu un siya osa'n mangipangpangu kan cha mamati, bibiyu ya lapotog un kawachi piola. <sup>2</sup> Ha mangipangpangu, masapuy'n lappun kachillawala, ossaan chi asawala, laalled, maattomala cha lawwing un pion chi longegla, laangsan ya mapotgen. Masapuy'n malagmangili ya masapuy'n ammula'n mantudtuchu. <sup>3</sup> Achipun kabubuuk ya kagugulu, ngim laalus, achipun makasubosubog ya achipun maagum si pilak. <sup>4</sup> Masapuy'n ammula mangichayan si byeyanla kan tuttuwaon cha aalakla ya potgoncha siya. <sup>5</sup> Ti lu lappun ammula un mangichayan si byeyanla, sinchumadlu un achipunla maichayan cha mamati kan Apudyus. <sup>6</sup> Masapuy'n chakampun si malamchamu'n mamati, ta achi sumayaw ya achipun machusa un isun chi lachusaan Satalas. <sup>7</sup> Masapuy bo'n mabiilan cha achipun mamati, taplu achipuncha

---

§ **2:15** 2:15 Ha uchum kalancha achipun abus cha umalakancha un mibyegbyega ngim pati bo ligatcha un ila. \* **2:15** 2:15 Ha uchum un piola'n uguchon si Greek, ngim matagucha lu

siya am-amswiwon ya achipun miyus-ub kan cha sikap Satalas.

### *Ha Kilatatagun Chi Diakono*

<sup>8</sup> Isula bo kan cha diakono, masapuy'n potgon cha tagu ya miyun-un-un chi man-uugudcha. Achipuncha kabubuuk ya achipuncha maagum si pilak. <sup>9</sup> Masapuy'n mampeykas chi som-somokcha un mamangchon si katuttuwaan mipanggop si pammati un impakaammun Apudyus kan chitaku. <sup>10</sup> Masapuy bo'n awed pilachascha'n akom, ked lu ustу mangkokopyacha, makwa'n mansimbicha un diakono.

<sup>11</sup> Siya bo kan cha asawacha un masapuy'n potgon cha tagu chicha, achipuncha mallikud, maattomancha cha lawwing un pion chi long-egcha\* ya mantegochencha si losan un kooncha.

<sup>12</sup> Ha diakono masapuy'n ossaan chi asawala ya ammucha'n mangichayan kan cha aalakcha ya byeyancha. <sup>13</sup> Ti cha diakono un ustу kooncha un mansimbi, mibilangcha'n langatu ya takcheyancha ugudcha mipanggop si pumaticha kan Jesu Kristu.

### *Lappun Miyisuwan Chi Killingwan Apudyus*

<sup>14</sup> Maluyatak kan sika si sala, ti lamlamaok un achipun mabyeyeg ked umaliyak manggeggakay kan sika. <sup>15</sup> Ngim lu mataktakak, ha suyatku mangipakaawat si ustу'n mambibiyeg taku un lipati si byeyan Apudyus,<sup>†</sup> ked chitaku awechen

---

\* **3:11** 3:11 Ha uchum un piola'n uguchon si Greek masapuyн achipuncha mabuuk. † **3:15** 3:15 Ha uchum un piola'n uguchon si Greek ha inggewan Apudyus un matattagu.

Apudyus un matattagu, ti chitaku isun chi tukud ya pon-ed un misaachen chi katuttuwaan.  
**16** Lappun miyiswan chi lipaila un katuttuwaan mipanggop kan Jesu Kristu un pilati taku, ti lambyalin siya tagu, ya pilaloklokan chi Ispiritu kilabiýula

ya illilan cha angheles Apudyus siya.

Libyegbyega mipanggop kan siya si kaili-ili  
 ya pilatin cha achu'n tagu siya utla pita,  
 ya lipangatu'd langit ta machayaw.

## 4

### *Tanchaalanyu Cha Tilutului'n Itudtuchu (1Ti. 1:3-11; 2Pe. 2; Jud. 8-13)*

**1** Lalaweg chi imbyegan chi Ispiritun Apudyus un chumtong chi timpu un man-awichen cha uchum un tagu ustú'n pammati, ked tuttuwaon-cha cha tuntulli un itudtuchun chi ayan. **2** Cha pin-a mantudtuchu si tuntulli, aginpapaticha ya achipuncha mailasin cha lawwing un pin-acha koon, ti lambyalin un siya ugalicha. **3** Cha kamatchi'n tagu, itudtuchucha un mipalit chi mangasawa ya paliyawoncha'n kalon cha uchum un makan. Ngim killingwan Apudyus cha kalasin cha makan ta kalon cha tagu, ked chitaku'n lamati kan langammu si katuttuwaan, manyaman taku ked makwa'n kalon taku ulay silu'n makan. **4** Ti losan un killingwan Apudyus bibiyu, ked achipun mipalit un kalon lu manyaman taku kan Apudyus. **5** Ti mibilang un mampeýkas chi makan gapu si ugud Apudyus ya luwalu taku.

*Ha Mitudtuchu Kan Cha Mansimbi Kan Jesu  
Kristu  
(2Ti. 2:14-26)*

<sup>6</sup> Sulud, lu itudtuchum cha alla kan cha susulud un mamati, mambyalinka bibiyu un mansimbi kan Jesu Kristu. Machogchog-an chi man-aawatlu si katuttuwaan mipanggop si pammati ya tuttuwa'n tudtuchu un litudtuchu kan sika.

<sup>7</sup> Timothy, achim chochongyon cha istorya un lappun simbila ti lappun ituyungla si pammati. Ha koom, ipapatim un mangileyam si long-eglu un mangwa si pion Apudyus. <sup>8</sup> Alla simbin chi mampakoscheyan taku si long-eg taku'n mangwa kan cha koon, ngim simbumayu lu pakoscheyon taku laapudyusan un palagsimbi kan Apudyus, ti likari si sala'n biyeg taku ya biyeg taku si umali'n eygew.

<sup>9</sup> Tuttuwa cha imbyegak, ked masapuy'n patiyon taku'n ustu-ustu. <sup>10</sup> Ipapati taku un mangwa si pion Apudyus ulay maligatan taku, ti mallamlama taku kan Apudyus un matattagu si ing-inggala, un siya Malagu kan cha losan un tagu, sinchumadlu cha mamati kan siya.

<sup>11</sup> Sika Timothy, ibyegam ya itudtuchum cha alla kan chicha. <sup>12</sup> Achim ipalubus un ak-akitoncha sika gapu si kilaalaklu. Ngim sika otyan chi mantuyachen cha mamati si man-uugudlu, mambibiyeglu, man-aayatlu si asintatagum, mampopotpotlu si pammatim ya kilapeykas. <sup>13</sup> Inggala umaliyak utlat, ipupuutlu'n mangibyasa si ugud Apudyus kan cha tagu, segagom chicha, ibyegbyegam ya itudtuchum chi ugud Apudyus kan chicha. <sup>14</sup> Allechem

cha illidchon Apudyus un kabyeeyam si gummingaan cha propeta ya si langipatayan cha mangipangpangu si imacha kan sika.

<sup>15</sup> Sosomkom cha allaya'n intudtuchuk kan sika ta koom si losan un kabyeeyam ta mangitullongan cha tagu un pumingopingot pammattim.  
<sup>16</sup> Allechem chi long-eglu ya cha itudtuchum. Ipapatim un mangwa kan cha alla ta matataguka pati cha manchongey kan sika.

## 5

*Ha Biyang Taku Mipanggop Kan Cha Biyun  
 Taku Un Mamati  
 (Tit. 2:1-15)*

<sup>1</sup> Achim omyan cha lalaklakay lu sika, ngim ammam iyug-uggud un isun chi amam. Ya ibilanglu cha laan-alak lu sika suludlu. <sup>2</sup> Ya cha mangkabyakot, ibilanglu chichà ilam ya cha byebyeyasang, ibilanglu chicha susuludlu'n byebyai un lappun lawwing si somsomoklu.

<sup>3</sup> Asikasuwonyu cha labyayu un lappun uchum si mangasikasu kan chicha. <sup>4</sup> Ngim lu awed aalakcha willu apucha, tudtuchuwam chicha ta chicha mangasikasu si ilacha'n labyayu, ti ha byeyancha umun-ula'n mangwaancha si akomcha un laapudyusan, ya subyalitancha cha kingwan cha chachakkeycha ti hachi mampagalas kan Apudyus. <sup>5</sup> Ngim cha labyayu'n lappun mangasikasu kan chicha, si Apudyus abus chi lamlamaoncha'n tumuyung kan chicha, ked iluwaluwalucha si ileygew ya lilabi un manchawat si tuyung Apudyus. <sup>6</sup> Ngim ha labyayu

un siyad pin-ala somsomkon cha pion chi long-ebla, isun chi lalattoy kan Apudyus ulay lu matattagu. <sup>7</sup> Itudtuchum cha alla kan cha mamati ta lappun mapabyasuyancha. <sup>8</sup> Ngim lu awed achipun mangasikasu kan cha agila, amod gey cha kabyeyoyla, isun chi lan-awichela pammatila, kan sillumawwing lu cha achipun mamati.

<sup>9</sup> Cha ilistayu'n labyayu un makasapuy si tuyung, cha mantawon si olompuyu willu labyakbyakot ya achipun kasin langasawa.\* <sup>10</sup> Masapuy'n laammuwan cha losan un bibiyu killingwala, un isun cha in-ilola'n lamachakey kan cha aalakla, malagmangilicha ya lapakumbyabyacha'n lansimbi kan cha mamati,<sup>†</sup> tiluyungancha cha manligligat ya impapatila'n langwa si bibiyu.

<sup>11</sup> Ngim achiyu ilista cha labyayu un chaampun bumakbyakot ti lu gumatong chi timpu un pioncha'n mangasawa, man-awichencha si Kristu. <sup>12</sup> Ked hachi machusaancha, ti achipuncha tung-payon chi ingkaricha kan Apudyus un kooncha.<sup>‡</sup> <sup>13</sup> Ked mambyalincha masachut ya manattu-attuncha kan cha byebbyeyoy, ya maam-amod ti ilugicha'n mallikud ya mangkiyakiyap si lappun bibiyangcha. <sup>14</sup> Ked itudtuchuk kan cha labyayu un chaampun bumakbyakot un unulloy lu kasincha mangasawa ta umalakcha ked

---

\* **5:9** 5:9 Ha uchum un piola'n uguchon si Greek achipun cha lakachechgchesas. † **5:10** 5:10 Ha ibyegala si Greek bilebyayancha ikin cha tagun Apudyus. ‡ **5:12** 5:12 Chuwa piola'n uguchon si Greek: cha somsomokcha mampabyasuy kan chicha ya makabyasuya.

awed asikasuwoncha'n byeyancha, ked lappun wayan cha mampabyasuy un mangamsiw kan chitaku. <sup>15</sup> Ti awed cha uchum un labyayu un lagamputcha lansagung kan Satalas.

<sup>16</sup> Ked lu awed mamati'n byebyai ya awed labyayu si agila, masapuy'n siya mangasikasu kan siya ya achipunla ipabiyang kan cha mamati. Ked cha mamati siyad asikasuwoncha cha labyayu un lappun mangasikasu kan chicha.

<sup>17</sup> Ked cha alla'n mangipangpangu kan chikayu'n mamati un bibiyu mangkokopyacha, masapuy'n ipotogyu chicha ya chog-anyu tangchencha, amod gey cha mangipapati un mangibyegbyega ya mantudtuchu si ugud Apudyus. <sup>18</sup> Ti ha liigili'n ugud Apudyus kalala, "Achiyu bunguton chi tupok chi luwang un manilikonyu taplu makwa un mangan lu piola."§ Ked ha osa bo, "Masapuy'n matangchalan chi mangkawachiyon."\*

<sup>19</sup> Ya achiyu tuttuwaon chi ipabyasuyn chi osa si osa'n mangipangpangu malaksig lu awed chuwa willu tiyu mantistigu un tuttuwa'n lakabyasuy. <sup>20</sup> Ngim lu awed lakabyasuy'n mangipangpangu, omyanyu si sangwalanyu'n mamati ta umogyat cha uchum un mangwa si kamatchi.

<sup>21</sup> Timothy, bililok sika si sangwan Apudyus ya si Jesu Kristu ya cha lachutukan un angheles ta tuttuwaom cha losan un imbyegbyegak, un lappun laksigom si tagu. <sup>22</sup> Achika achanchalutuk si mangichayan kan chikayu'n mamati, ya

§ **5:18** 5:18 Deuteronomy 25:4 Itullongyu 1 Corinthians 9:9

\* **5:18** 5:18 Luke 10:7

achika mikama si mambyasuyan cha uchum. Ya allechem ta achika makabyasuy.

<sup>23</sup> Chakampun un abus chi chelum si ilumom, ngim masapuym chi akit un byeyas<sup>†</sup> ta maagasan chi sakit chi buwanglu.

<sup>24</sup> Awed cha uchum un tagu'n mamàila byasuycha, ked mampapattak un machusacha. Ngim cha uchum, achipun milasin cha lakabyasuyancha, ngim asi maila lu alungus chi eygew.

<sup>25</sup> Ked kamatchi un mamàila cha bibiyu un pinan cha uchum un tagu koon, ya ulay cha achipun milasin un bibiyu, achipuncha mitayu si inggala.

## 6

<sup>1</sup> Lu mipanggop kan cha musassu'n matati, masapuy'n potgoncha'n ustу-ustу cha simmusassu kan chicha taplu lappun machillawan Apudyus ya alla'n itudtuchu taku. <sup>2</sup> Lu matati simmusassu kan chicha, masapuy'n achipuncha am-amsiwon ti mansusuludcha gapu si pammati. Ngim masapuy'n mangkawachicha'n ustу gapu ta siya'd mangapit si kawachicha cha susuludcha'n matati un ay-ayatoncha.

*Mipanggop Si Sabyali'n Tudituchu Ya Kilabyaklang*

(Jas. 5:1-6)

Timothy, masapuy'n itudtuchum ya ilaweglu'n ustу-ustу cha alla. <sup>3</sup> Lu silu mantudtuchu si sabyali'n tudituchu un achipun mitimbuyuy si

---

<sup>†</sup> 5:23 5:23 Ha byeyas cha Judio ked lampeypu si byeyat chi grapes.

ustu-ustu'n ugud Apu taku'n Jesu Kristu ya laapudyusan un tudtuchu,<sup>4</sup> lasayaw ya lappun ammula kamatchi'n tagu. Siyad lagalasola makaisisik ya makasubo-subog kan cha ugud un lappun simbila. Ha illoswala man-illapos, susubog, mangkikilliayap ya lawwing un somsomok kan cha biyuncha.<sup>5</sup> Ya pasig susubog cha pinacha koon kan cha tagu'n liluus lummawing chi somsomokcha ya laliwatancha katuttuwaan. Ti ha somsomokcha mipanggop si pammati, ked siya bumaklangancha.

<sup>6</sup> Ngim sabyali kilabyaklang chi tuttuwa'n matmati kan Apudyus, ti tuttuwan byaklang taku lu maplok taku si awed kan chitaku.<sup>7</sup> Ti lappun intagaked taku si liyalakan taku utla lubung kan lappun bò iyawit taku lu matoy taku.<sup>8</sup> Ked lu awed umalay un kalon taku ya umalay un silup taku, maplok taku otyan.<sup>9</sup> Ngim cha tagu'n pioncha'n bumaklang, lalaka masulisugencha ya achu milus-ubyencha un kooncha'n tilitingang ya lawwik un pion chi long-egcha, ked siya mayam-alancha ya mibylluwancha.<sup>10</sup> Ti ha kilaagum si pilak ked siya puun cha losan un lawwing. Awed cha uchum un gapu si kilaagumcha, lan-awichencha pammatica kan Apudyus, ked hachi gapula un singkawed chi malak-amcha'n ligat.

### *Ipapatim Un Mangwa Si Pion Apudyus*

<sup>11</sup> Ngim sika Timothy, tagu chika kan Apudyus ked masapuy'n man-awichem losan cha alla, ked ha koom ipupuutlu'n mangwa si ustу ya

laapudyusan un biyeg. Pakoscheyom chi pammatim, ayatlu, kilaattomlu ya kilaaluslu kan cha asintatagum. <sup>12</sup> Ipapatim un mangisiked si pammatim un isun chi makatodtodchakka, ked magunggulaanka si mallalayun un biyeg un siya langayagen Apudyus kan sika ta ipakaammum chi katuttuwaan si sangwan cha achu'n tagu. <sup>13</sup> Bililok sika si sangwan Apudyus un mangatod si biyeg kan cha losan ya si Jesu Kristu un lantistigu si katuttuwaan si sangwan Pontius Pilate. Ha ibyegak kan sika: <sup>14</sup> Masapuy'n tuttuwaom cha losan un bilin Apudyus ya ilam ta awed mikawas si itudtuchum willu awed ipabyasuycha kan sika inggala si mangulilan Apu taku'n Jesu Kristu. <sup>15</sup> Ta lu chumtong chi ust'u'n timpula ipeyang Apudyus si Jesu Kristu utla pita. Si Apudyus abus chi kangatuwan ya mallakabyelin un manturay. Siya Arin cha losan un aari ya Apun cha losan un ap-apu. <sup>16</sup> Siya abus chi achipun matoy si ing-inggala ya lappun tagu si makaachali kan siya. Lalipud si chamchamu, lappun tagù langitullong kan siya ya lappun bò makaitullong kan siya. Ked siya machaychayaw si ing-inggala ti lappun miyisuwan chi kilabyelinla! Amen.

<sup>17</sup> Timothy, bililom cha byabyaklang utla lubung ta achicha is-iskey ya achicha mallamlama si kilabyaklangcha un sin-akitan chi mau-masala. Ngim si Apudyus chi mallamlamaancha, un mangato-atod kan cha losan un kasapuyan taku ta gumalasan taku. <sup>18</sup> Ya ibyegam kan chichcha ta kooncha bibiyu. Masapuy'n labyaklangcha si bibiyu'n kopya ya mallaaycha ya

masapuy'n mangàatodcha kan cha uchum un tagu. <sup>19</sup> Lu katchi kooncha, ud langit chi mitepolan cha mallalayun un bilaklangcha un mampakchot chi misaachela si umali'n eygew ti hachi mataguwan un mallalayun ya siya gettok un biyeg.

<sup>20</sup> Timothy, masapuy'n ayyuwalam cha losan un impiyeyn Apudyus kan sika. Ya achim chongyon cha man-ugu-ugud un lappun sim-bin chi pin-acha man-is-isikan un kalancha'n lalaingcha kalu ngim tilutuli cha hachi. <sup>21</sup> Awed cha uchum un lan-awichencha pammaticha gapu ta kalancha'n lalaingcha kalu.

Sapay otyan ta kumachegu si Apudyus kan chikayu losan.

**Ha Ugud Apudyus  
Kalinga, Lubuagan: Ha Ugud Apudyus (New  
Testament)**

copyright © 2019 Wycliffe Bible Translators, Inc.

Language: (Kalinga, Lubuagan)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

a19fa55b-374d-526a-9fee-6924d9f6cec8